



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 8

Kenya nung sorkar anema longkak aiter nisung trok süogo

Bengaluru FC-i striker Curtis Main alizükogo



VOL. XX NO. 278 (ADOK 278)

DIMAPUR

ROGONÜ (FRIDAY)

CHITENI (JULY) 21, 2023

₹ 5.00

Tanü HSLC & HSSLC Compartmental Exam result sangdongtsü

Dimapur, Chiteni/July 20 (TYO): Nagaland Board of School Education (NBSE) ajanga agiba High School Leaving Certificate (HSLC) aser Higher Secondary School Leaving Certificate (HSSLC) Compartmental & Improvement Examination 2023 indang provisional results ya July 21, 2023 nikongdang sangdongtsü. Result indang soft copy ya Board indang Portal (www.nbsenl.edu.in) nung angutsü. Anungji candidate temi pei indang provisional mark

sheets ya NBSE portal nungi download sütettsü. Board ajanga documents tem Centre Superintendents nem July 24 nungi July 25, 2023 nung ang agütsütsü. Iba sülen Centre Superintendent-i meshir pa/la indang Centre kübok aliba school tem nem lema agütsütsü. Centre Superintendent marutetra, pai/lai ano danga Centre Superintendent ka nem pa/la tenüing nung agizüksü temelaba agütsütsüla, ta sangdong ka ajanga ashi.

CM Rio-i Manipur nung 'tesempatsü' mapa aitsü

Kohima, Chiteni/July 20 (TYO): Ita ana tejakdang Manipur nung tetsür ana yimtung nung tashiyim amshia mangsa anir senzüba video ka Bodhbarnü temai adokba sülen Nagaland Chief Minister Neiphiu Rio-i Brehostibarnü iba tatalokba aitsü aser ibai tesempatsü mapa lir ta ashi.

shiranger," ta Rio-i tweet ka nung ashi. Rio-i Manipur indang CM, N Biren Singh aser Union Home Minister Amit Shah dang memonui inyaksü ajungshia liasü. Nüburtemi tamang katettsüsa mera tejangja agitsü pai lenirtem dang ajungshi. "Asenoki sensosanger ajak

"Manipur nung atalokba ya taochi makaba tazü aser taksü mapa lir. Iba tesempatsü mapa ni jenjang tematiba nung aitsür. Tejakleni aoba lima nung iba ama nisung telok-teloki taochi mesayui mapa tamajung inyaksü tesem maka. Manipur nung lendong balala atalokyonga aruba ajanga asenok temolung

indang temeden kumzüka ayutsüla. Azüdokshi nungi pila alitsüla aser yimjung tesunep nem kokdaksütsüla," ta pai ashi. "Rara adokba nung teti tai maket tetsür aser tanurtem dak mezüing aser tamajungtiba kongshir. Asenok ajaki yimjung asoshi inyaksüla," ta CM Rio-isa ashi.

Manipur nung ano nisung ka tekolak lepzükba video temai adok

Imphal, Chiteni/July 20 (Agencies): Manipur nung Meitei aser Kuki nunger tsüingta mangatetep adoker anogo ka sülen May 4 nü Kangpokpi district nung tangokba video ka nung tebur telok kati danga kin nungi tetsür ana yimtung nung tashiyim amshia mangsa anir senzüba temai adoker anogo ka lir Brehostibarnü ano video ka prokshiba nung David Theik tekolak ya Bishnupur district kübok nisung alidak tesem ka nung süngkum agi yangluba atsü nung songdaka liasü.

Mairembam Romesh Mangang-i amer liasü. Iba noksa nung Mangang-i Thiek tekolak ya teka ka agi amer aser teka ka agi nok ka amer liasü. Ajisüaka iba video ya July 2 nü mezüing temai adoka liasü. Osang kar ajanga ashiba agi, Manipur indang Bishnupur district kübok July 2 anepdang 12:00 ako nung azüdokshiba mapang nisung asem tepseter rongnung Theik ya ka lir. Bishnupur aser Churachandpur district arütsülen telungpur telok kati amakdang nisung asem ya tepset aser iba mapang ki aika rongdoktsü aser nisung kar pua bener ao, ta osang ajanga ashir.

Ano internet nung prokshiba noksa ka nung Theik tekolak ya Kumbi BJP MLA Shanti Kumar alias Sanisam Premchandra Singh indang security guard,

Manipur nung tetsür ana mangsa anir senzüba aser tashiyim amshiba nung tai tonglokja alirtem rongnung arishi kum 32 tain Huiem Herodas Meitei ya Brehostibarnü Manipur Police-i Thoubal district nung apu.



Manipur: PM Modi-i ola adokogo, Supreme Court-i totuyuba agütsü

New Delhi, Chiteni/July 20 (Agencies): Manipur nung taküm May ita tetenzüklen nungi kin ana tsüingta rongrong adoka azüdokshia aruba dak sendakba nung India Ato Kilonser Narendra Modi-i mezüingbuba ola Brehostibarnü adoka liasü aser linük ajunga asoshi maksü, ta ashi.

Manipur nung tetsür ana mangsa anir senzüba indang video dak sendakba nung jembidang, aibelener kata nema tatok magütsütsü, ta Modi-i ashi.

"Ni linük dang ya ashir, aibelener kata nema tatok magütsütsü. Ozüing tashi ajak amshia tapet mera agitsü. Manipur jalatem dak kechi atalokogo, ya kodanga tatok magütsütsü," ta pai ashi.

Manipur nung tetsür ana mangsa yimtung nung anir senzüba video ka internet asüingba mechi linük tesem ajungalen nungi ola adokba sülen PM Modi-i iba o ya shia liasü.

Manipur nung Meitei aser Kuki nunger tsüingta mangatetep adoker anogo ka sülen May 4 nü Kangpokpi district nung tangokba video nungya tebur telok kati danga kin nungi tetsür ana yimtung nung tashiyim amshia mangsa anir senzüba sayua liasü.

"Item tatalokba ya linük ajunga aser senso sanger ajak asoshi maksü lir. Rajasthan, Manipur mesüra Chhattisgarh nunga süang, Chief minister ajak dang tetsür ajunga kumzüka ayutsü ni ayongzüker. Tetsürtem kumzüka ayutsü asoshi asenok politics dang temaba nokdaksüla," ta India ato kilonseri parliament monsoon session tenzüksü lia ashi.

Manipur nung tashiyim amshia tetsür ana yimtung nung mangsa anir senzüba ya khenyongi magizükter, ta Chief Justice of India, DY Chandrachud tekolakba sür aliba bench kati ashi aser Centre aser

state (Manipur) sorkar dang tekeraba nung mera agir court nem osang agütsütsü tuyu.

Iba video temai adoker anogo ka sülen Supreme Court-i tashi amshia ken o benoka jembia liasü.

"Yashi temai adokba video ajanga asenok anisungzüker mangur," ta Supreme Court tenüing nung DY Chandrachud-i ashi.

"Media nung prokshiba video ajanga constitution tsütsü aibelenba aser meimchir temeden anema inyakba sayur. Tensa mejungi alidak osettsüset ama tetsürtem amshiba ya constitutional democracy nung magizükter."

Court-i state sorkar aser Centre dang iba tatalokba indang osang tejangja meshia liasü.

"Mera agitsü atema onoki sorkar nem mapang tatsüka agütsütsü, mesüra onoki mera agitsü... Ibai kangasa tim masü," ta CJI ajangasa ashi.

Manipur nung tetsür ana mangsa anir senzüba video agi linük anokshitsü

Guwahati, Chiteni/July 20 (Agencies): Manipur nung mangatetep adoka aliba kin ana rongnung kin ka nungi tetsür ana mangsa yimtung nung Meitei nunger tebur telok kati anir senzüba indang video Bodhbarnü temai adokba ajanga India linük dang masü saka alima ajunga anokshitsüogo. Tetsür ana ya anasa aliba alu ka nung anir oa item tebur telok yagi tashiyim amshia shi nung medem, ta ashir.

Indigenous Tribal Leaders' Forum (ITLF) ajanga sangdong ka agütsüba nung, iba mapa tamajung ya May 4 nü Manipur yimtiba, Imphal nungi kilometre 35 shi pilar Kangpokpi district nung inyak.

Iba temolung ayangtsü video nungya nisung telok kati tetsür ana ya süoshi ajak semzüksür mangsa anasa aliba alu leni tashiyim agi atsür oa liasü. Iba mapang tetsür ana ya teyari meshia ajepba olang angashi.

ITLF ajanga tetsür ana ya Kuki-Zo kin nunger lir aser tena merenshiba telok ya Meitei nunger lir, ta ashi aser parnoki iba tatalokba aija liasü.

Iba tatalokba meteta ITLF ajanga National Commission for Women aser National Commission for Scheduled Tribes dang tekeraba nung

mera agitsü ayongzüka liasü.

Kasa mapang Manipur Chief Minister N. Biren Singh-i ashiba agi, iba video dak sendakba nung sorkari nüngdakba mera agir aser bushisüingdangtsü totuyuba agütsüogo.

"Yashi temai adokba video nung timtem tuoshi jenti ajuruba tetsür ana den kü molungjang dena lir. Temolung shirangtsü video temai adokli Manipur Police-i nisung mezüingbuba tanep puogo. Kanga junga bushisüingdang tenzüko aser aibelener nem tasüba temerenshi dena tapet temerenshi agütsütsü. Asen lokti nung iba ama mapa tamajung inyaker alitsü tesem maka," ta Biren Singh-i ashi.

Manipur Police-ia Twitter nung, "May 4, 2023 nü mejangjaba nisung temi prangbong bener tetsür ana mangsa yimtung nung anir senzüba video dak sendakba nung tashiyim amshia apuba, teloki tashiyim amshia shi nung medemba aser tepsetba amala ken o Nongpok Sekmai PS (Thoubal District) nung benoka bushisüingdang tenzüko. Aibelener tem tekeratiba nung aputsü asoshi state police-i meranga inyaker," ta zülutsü.

Union Minister for Women and Child Development, Smriti

Irani-ia iba video dak sendakba nung Manipur Chief Minister den jembio, ta ashi.

"Manipur nung tetsür ana dak tashiyim amshiba video nung sayuba ya aitsütsü langa lir aser nisung meimchir masü ama taochi mesayur reshikangshia amshiba lir. Ni CM N Biren Singh den jembio aser pai bushisüingdang tenzüko aser aibelener nem tapet temerenshi agütsütsü asoshi meranga inyaksü ta küdang shiogo," ta Union Minister-i tweet asü.

Tribal tsür ana May 4 nü mangsa yimtung nung anir senzüa tashiyim amshiba dak sendakba nung tai tonglokja alirtem rongnung nisung ka Brehostibarnü Manipur Police-i puogo.

Pua alisang ya Pechi Awang Leikai nungi arishi kum 32 tain Huiem Herodas Meitei ta jangjaogo. Pa ya alima sünga prokshiba video indang teyari nung Thoubal district nung apu. Video nung pa ya T-shirt sentsü tamak semer liasü, ta police-i ashi.

Second 26 video nung iba nisungba ya jangja-jangja angur, ta ketdangtsür temi ashi.

Manipur nung azüdokshi tenzüker anogo ka sülen May 4 nü Kangpokpi district nung iba video ya tangoka liasü.

FAC nung orientation sentong agiogo



Dimapur, Chiteni/July 20 (TYO): Fazl Ali College, Mokochung nung 1st Semester BA/BSc 2023 kaketshirtem atema orientation sentong ka ayongzüka katsüoogo. Iba sentong ya Dr. Temjennaro, Asst. Professor, Dept. of Education lenisüba nung agia liasü.

Sentong nung o jembiba mapang principal Dr. I Wati Imchen-i kaketshir tasentem pelashishia agizük. Paisa kaketshirtem dang langka tasen kar inyakdangtsü aser ken o ajak rasa bilemdangtsü atema shimtsü ajungshia liasü.

Maneni pai kaketshirtem dang co-curricular & extracurricular activities ajak nung shilem agitsü ajungshia liasü. Iba college indang nukjidong tongtibangtibaji education jenjang tajungtiba agütsü aser institution maneni renlokyonga aotsü atema lir, ta pai ashi.

Sentong nungsa Disciplinary Committee Convenor aser Associate Professor Dr Imcharenla-i, yimayimpong shidak benshitsü koda tongtibang iba indang metetdakja liasü. Laisa, college indang temzüng ozüngtem metetdaksü aser kaketshir kati koda iba sülen anidaksü

nüngdaker iba indang lemsatepa liasü.

Kasa mapang nung Anti Ragging Cell Convenor aser Assistant Professor I. Narola Imchen-i, ragging aser iba dak sendaka aliba aibelentem raktoktsü atema college bendanga agütsür aliba indang metetdaksü. Lai, iba amala tatalokbatem kodaser jangjatsü aser ketdangsürtem nem metetdaksütsü iba indang rasa ashi.

FYUGP NEP 2020 dak sendakba nung academic orientation ya HOD, Dept of English aser Associate Professor Dr Lanurenla-i agüja liasü.

Maneni library dak sendakba nung Librarian, Fazl Ali College Dr Lendina-i tangazükba agütsü. Lai, NDLI aser N-LIST indang kaketshirtem nem metetdakja liasü. NDLI (National Digital Library of India) ya all-digital library ka lir, kong kakettem, osettem, video tem, thesis tem aser tanga educational materials tem densema lir. Iba ya digital educational resource ajak nem agütsütsü aser angazüktsü atema tashi agütsüba den kaketshirtem ajungmesotsü atema yangluba sabang ka lir, ta lai ashi.

Peren nung Integrated STI/HIV/TB & Hepatitis ISHTH Campaign tenzükogo

Dimapur, Chiteni/July 20 (TYO): Nagaland State AIDS Control Society kübok District AIDS Prevention Control Unit, Peren-i July 20 nü District Jail, Peren nung Integrated STI/HIV/TB aser Hepatitis ISHTH Campaign tenzükogo.

Sentong nung alakteta jaoker ama o jembiba mapang ADC, Peren Keyirangding Hegui-i, libaliro melenshia anema alitsü asoshi jenjang tapet agitsü aser lokti nem tajangzük tali agütsütsü atema asenok tebilemdangba melenshitsüba dak rangloker jembia liasü.

Sentong nungsa DTO/DACO, Dr. Keholi Assumi-i, tashidak balala tendangtsü aser

temang tendangtsü asoshi maongka agütsüba agitsü ajungshi, kechiyong tashidak takaratiba nung poteta takaratiba nung temang anepalubaji tashidak balala anepalutsü atema ajak dang tajungtiba lir ta ashi.

Kasa mapang nung ADC, Peren Keyirangding Hegui-i, District Jail, Peren nung Integrated STI/HIV/TB aser Hepatitis ISHTH Campaign ya tenzükja liasü.

Iba sentong ya DPO, DAPCU Rovikhoto Mor lenisüba nung agi aser District Jail, Peren Chaplain Suzana-i sarasadema liasü. Sentong nungsa Asstt, Jailor, District Jail Khuchilo-i tepela o jembia liasü.

Home Department-i metetdaksür

Dimapur, Chiteni/July 20 (TYO): July 19 nü Home Department-i osang agütsüba dak ajemdaker July 21 nü senden amentsü

sangdonger aliba ya mepaitoktetba maparen kar aliba ajanga July 24 nü 10:30 ako nungi tenzükja amentsü ta metetdaksüogo.

State kübok P&OCS nung ISHTH campaign amenokogo

Dimapur, Chiteni/July 20 (TYO): State ajunga atema Prison & Other Closed Settings (P&OCS) nung Integrated STI, HIV, TB, Hepatitis (ISHTH) Campaign July 20 nü Director of Prison Headquarter, Kohima nung amenokogo.

Campaign indang jembiba mapang Jt. Director, (Prevention), NSACS, Dr. Bernice D. Thapru-i, linük ajunga nung HIV tashidak maneni menatepyonga aoer, koba tepuokdaka menatepa aoba potetogo, iba dak sendakba nung campaign amenoktsü kanga nüngdaka aküm aser linük nung Nagaland tasembuba nung lir ta ashi.

Laisa, iba Campaign yagi comprehensive health camps dak rangloker inyaksangshitsü kong tashidak tendangba densema lir, ta ashi. Camp tem nung medical team tem densema alitsü kong tanga mapang ama temang tendangtsütsü aser iba den HIV, syphilis, TB aser Hepatitis (B&C) tashidak tendangtsü, ta lai ashi. Maneni Dr. Bernice-isa, iba amala

tashidak potetertem maneni temang anepalutsü atema rangloker inyaksangshitsü. State nung tepuokdak tenet lir kong iba campaign tenzükogo, ta laisa ashi.

Tanga closed setting tem rongnung Ujjwala Home, Sakhi One Stop Centre amaka Social Welfare facilities tem densema lir, koba nijai mesüra sorkari achayanger aser item facility tema iba campaigne küboki aitsü ta lai ashi. Maneni lai, iba campaign yagi app ka ajanga NitiAayog asadangtsü aser report ya monitoring atema dang asütsü aser client tem indang jurila osang kecha magütsütsü, ta ashi.

Sentong nung o jembiba mapang Director General (DG) of Prison, Renchamo P. Kikon, IPS-i ashiba agi, iba amala tashidak aser talisa HIV tashidak aziüktsü atema lenla ajak nungi jenjang agitsü nüngdaker. Paisa, tepuokertem melenshidaksütsü atema iba amala campaign nüngdaker aser tepuokdak tem ya parnok atema melenshiba tesem ka südaksütsüla, ta ashi. DG-i ashiba agi, tepuokdak

ketdangsertem dang masü saka social and welfare department amala department ketdangsürtem nem tangazükba agütsütsü kanga nüngdaka lir.

Ketdangsür aser unit ajak nem tangazükba agütsütsü nüngdakba pai lemsatep, kechiyong item ketdangsürtem yagi iba sentong indang jangja melira parnoki koda tepuokertem tejakdangi arutsü atema ajungmesotetsü, ta pai ashi.

Maneni pai, ken o dak sendaka aliba department tem dang tepuokdak pharmacy tem tali amenoktsü atema teyari agütsütsü mepeshiba den iba sentong ajanga state nung dang masü saka linük ajunga nung HIV tashidak raktokba nung teyari agütsütsü imlaba lemsatepa liasü.

Kikon-i, ISHTH Campaign atema IEC Materials tem sayatsü aser District Jail nung Health Camp tenzükja liasü.

Iba sentong ya Department of Prisons, Department of Social Welfare aser Nagaland State AIDS Control Society nungeri longjemer ayongzüka agiogo.

SDO (C) Chümoukedima-i tekümdangtsü metetdaksü

Dimapur, Chiteni/July 20 (TYO): Sub-Divisional Officer (C), Chümoukedima, Chumbenthung Murry-i sangdong ka ajanga, 'PMMVY' Office tenüng amer scammer temi calla süba mesüra text message yokba onsang angazükba indang metetdaksü

Parnoki bank account tem hack asütsü meranger aser parnok inyakyimtemji yamai lir: scammer temi nisung ka dang call asütsü aser bank account details meshir. Iba sülen parnoki Whatsapp ajanga scane asütsü asoshi QR code ka yoker aser PMMVY

scheme kübok parnok indang bank account-i sen yoktsü ta tenangzükba agütsü. Scammer temi bank account yagi sen karbo yoker. Iba sülen minute ishika dang lir account hack asür aser sen ajak agizüker.

Iba dak sendakba nung SDO-i, ken o dak sendaka alirtem dang call aruba ya PMMVY cell nungi masü aser bank account details kodanga phone ajanga masüngdang mesüra QR codes meyoker ta nüburtem nem metetdaksütsü asoshi tetuyuba agütsüoogo. Iba amala call agizükertemi District Hub for the Empowerment of Women (DHEW) mesüra

women's helpline (9485239098) dangi call süa osang agütsütetsü, ta SDO-isa metetdaksü.

Temetetsü kaji Mission Shakti kübok Pradhan Mantri Matru Vandana Yojana (PMMVY) ya India sorkar indang conditional Maternity Benefit program ka lir. Temsüa aliba beneficiaries temi https://pmmvy.nic.in nung citizen registration ajanga online nungi apply süa iba scheme angati agitettsü mesüra Anganwadi Centers mesüra CDPO office mesüra DC office den attach süa aliba DHEW nungi agitettsü.



Dimapur, Chiteni/July 20 (TYO): Smart phone enabled ECG machine tem amshitsü asoshi training den repsema ECG machine amshia sayuba sentong ka July 20 nü Mokochung Chief Medical Officer indang office nung agiogo. Project of North Eastern Council (NEC) ajanga Chief Medical Officer, Mokochung nem 'Smart Phone Enabled ECG Machine'(mobile/cloud based ECG solution) 24 agütsüoogo. Health care workers tem nem training agütsüba sülen item machine tem ya Health unit tem nem Medical Officer, Mokochung-i lemja liasü.



MOKOCHUNG LAW COLLEGE

ADMISSIONS OPEN FOR THE YEAR 2023-2024 (L. LB)

(ADMISSION REQUIREMENTS)
Minimum B, A or Equivalent
50% for General and 40% for ST

Affordable Fee Structure
Moot Court / Well Established Library
Cum Digital Library
Along With Free Wifi Facility.

Contact us on - 9436006253/9856386557
Email:-mkglawcollege@gmail.com

NAGALAND STATE HUMAN RIGHTS COMMISSION
AGRI-FARM COLONY, LANE 6, POST BOX-02, KOHIMA-797001.
Ph:+91-3703572943,Email:nshrcnagaland@gmail.com

No: NSHRC/10/Appt /2023 Dated: Kohima the 20th July, 2023

ADVERTISEMENT

Applications are hereby invited from amongst the eligible candidates for filling up the post of MTS under Nagaland State Human Rights Commission, Nagaland as follows :

Sl. no	Name of the post	Pay matrix	No. of post	Eligibility criteria
1.	MTS	Level-1	06	1. Indigenous inhabitants of Nagaland 2. Class 8 passed

Note :

- The minimum age should not be less than 18 years and not more than the upper age limit of the existing policy of the State Government.
- Candidates are required to submit along with the application the self attested copies of proof of date of birth, proof of Edu. Qualification, Indigenous inhabitants' certificate, BT certificate and Employment exchange enrolment card and certificate showing proficiency in any trade(s) (if any).
- After scrutiny of the applications, suitable candidates will be shortlisted for interview/personal interaction.
- Reservation for backward tribes shall be as per the existing policy on State Reservation for backward tribes.
- The applications should reach the Nagaland State Human Rights Commission, Kohima on or before 26th July 2023.

(LIMANENLA)
Secretary, Nagaland State Human Rights Commission
Nagaland, Kohima.

MP sorkari laptops atema kaketshirtem nem sen cr. 196 agütsü

Bhopal, July 20 (Agencies): Bristostibarnü Madhya Pradesh state sorkari laptops alitsü atema kaketshir 78,641 indang bank accounts nung sen crore 196.6 inoktsüogo.

State Board-i ketdangüsü agiba class 12 tatidang nung 75% aser iba dang nungjagi teimba angur kaketshirtem nem state sorkari laptops alitsür.

Bhopal nung ayongzüka sentong ka nung Chief Minister, Shivraj Singh Chouhan-i 'button' ka nung nem-a kaketshirtem indang bank account shia nung sen 25,000 inoktsü.

Sangküm nungibo Central Board of Secondary Education (CBSE) nungi takok junga angur kaketshirtem nem-a sorkari laptop sempet agütsütsü, ta paisa metetdaksü.

Chouhan-i, "Ni tanurtem meimer aser parnok mangdang m e r a k s a d a k t s ü t s ü . Kaketshirtemi temaba jenjang alangzüksü aser tarutsü jenjang yanglutsü atema ozü sorkari akokba tashi ajak meranga inyakdar," ta metetdaksü.

"Sangküm nungibo onoki toppers ajak nem Scooty (scooters) agütsütsü. CBSE kaketshirtem nem-a laptop scheme agütsütsü," ta pai metetdaksü.

Timtem ajangshiba ajanga kaketshirtem aikati school züngtur anenadoker, ajisüaka school züngtur anenba nokdangtsü atema sorkari inyaktsü; sorkari state nung shisaliok infrastructure ajungkettsüdar, ta pai ashi.

Taküm küm tatembanglen BJP-i yimsüsüba state nung (Madhya Pradesh) Assembly elections agitsü atema party ajak renemshidar.



New Delhi, July 20, 2023: Bristostibar anepdang Congress Party Tir aser Rajya Sabha nung Opposition Lenir, Mallikarjun Kharge leniba nung INDIA teloktep nungi lenirtem senden amendang tangokba noksa nung angur.

Parliament nung opposition-i Manipur atema jembitsü akhang

New Delhi, Chiteni/July 20 (Agencies): Bristostibarnü tziingluruwa mongpu Parliament senden mezüing anogo nung House anaprongla nung opposition party temi Manipur nung tensa tamajungba akümba atema jembitsü takhangba agütsü.

Rajya Sabha aser Lok Sabha naprongla nung opposition züngsemtemi yimiyim maneni ayimba ajanga senden thinen aser Hokolbarnü ang senden asentenshir tenzüksü.

Rajya Sabha nung nikongdang 2:00 ako nung senden tanaben tenzükdang Chairman, Jagdeep Dhankhar-i onüktem benoktsü metetdaksü; iba sülen Union Minister Anurag Thakur-i Cinematograph (Amendment) Bill, 2023 benokba mapang nung opposition party balala nungi züngsemtemi yimiyim ayim tenzüka liasü.

Opposition Lenir, Mallikarjun Kharge-i senden nung Manipur tensa atema jembitsü takhangba agütsü, ajisüaka iba maongkaji magütsü.

Dhankhar-i yimiyim ayimba anentsü mepishiyonga opposition-i maneni yimiyim ayimba ajanga anogo piyong atema senden thina liasü.

Lok Sabha nunga minister temi onüktem benoktsü merangba mapang nung opposition züngsemtemi "Manipur Manipur" aser "Manipur rongdar" ta yimiyim ayim.

Parliamentary Affairs Minister, Prahlad Joshi-i, Parliament House anaprongla nung Manipur atema jembitsü asoshi sorkari melunga dang lir, ta lepshia metetdaksü, ajisüaka opposition-i yimiyim maneni ayimba ajanga senden lenir Kirit Solanki-i anogo piyong atema senden thinen.

Congress leniba nung opposition party temi tentetba 'INDIA' teloktepi Manipur onük ya tongtibangtiba onük kümdaktsüogo.

Bristostibarnep Ato kilonser, Narendra Modi-i mapang tatsüka Congress lenir, Sonia Gandhi den jembia liasü aser tanga lenirtema ajurua jembia.

Parliament senden atema asalentong yanglutsü atema anepdang opposition party balala nungi lenirtem Parliament nung Mallikarjun Kharge indang takdang nung senden mena liasü.

Maharashtra nung anentsüh lendong nung nisung 16 süogo

Mumbai, July 20 (Agencies): Maharashtra state tesem aika nung tziinglu sashia aruba mapang Bodhbar aonung 11:00 ako meta Raigad district kübok yimtsüing ka nung anentsüh lendong nung nisung 16 tashi süogo, ta ketdangsertemi metetdaksü.

State yimtiba, Mumbai nungi kilometer 80 shi pilar aliba Irshalwadi yimdak anentsüh lendong atalokba sülen Bristostibarnep Chief Minister, Eknath Shinde iba tesem jagi tonga oa tensa asadangba den külemi kümzüka mapa inyaktertem ajuruogo.

Chief minister Eknath Shinde-i, "Lendong atalokba mapang iba tesem nungji nisung 103 aliba jangjaogo. Parnok kar tzülü inyaktsü atema oadoker residential schools-i oa lir. Parnok tang tebushidak lir," ta metetdaksü.

Iba tesem nungji kümzüka maparen inyaktsü aser teyari agütsütsü atema state sorkari akokba tashi meranga inyakdar, ta paisa metetdaksü.

Osangbenertem den jembidang pai, "Tang teinyaktsü tongtibangtiba mapaji ali agi nembanga aliba nisungtem kümzüksü atema lir. Iba yimtsüing ya anentsüh lendong kanga bulua atalokba yimtsüngtem rongnung densema mali," ta metetdaksü.

Iba yimdakji ki 50 shi lir aser ki 17 bo anentsüh agi nembangadok. State nung tziinglu maneni arur, ibayongji ali aser janaji süklep 15 nungi 20 tashi temelem kümogo, ta chief minister-i metetdaksü.

Kümzüka maparen inyaktsü atema helicopter ana renema dang lir, ajisüaka tsüingsang-mopung majungba agi tang tashi mamshiteter, ta pai ashi.

CM-i, anentsüh lendong agi kongshirtem jenokdaksütsü atema containers 50 shi renemogo, ta metetdaksü.

"Anentsüh agi kongshiba yimdaklirtem nem teyari shidak agütsütsü atema onoki inyaktsü. Ni divisional commissioner aser district collector den jembia tangsa yimdaklirtem nem teyari agütsütsü atema o lemtepogo," ta paisa shisem.

2014 küm July 30 nü Maharashtra nung Pune district kübok Ambegaon nung anentsüh lendong tulu atalokba sülenbo tang ang anentsüh lendong tulu ataloker. 2014 küm iba lendong nungji anentsüh agi ki 50 shi rembanga liasü aser nisung 153 tashi asü.

Bristostibarnü Union Home Minister, Amit Shah-ia phone ajanga Eknath Shinde den anentsüh lendong osang metetpelaogo.



TIR YIMYIM YIMOBILEM (EDITORIAL)

DIMAPUR

ROGONÜ

CHITENI 21, 2023

Aika agi ana kümer tokteptsü!

India nung election nung tokteptsüsa Election Commission-i meteta aliba yimten telok 75 rongnung telok terka toktsür tanünga telok 64 agi telok ana kümer taruba küm election nung tokteptsü renemtepba ya jangratemtsüka repranger. Atangji, India temzüng agi, India nungbo yimten telok aika tenteta tokteptsü melar, iba jagi tamalen Congress telok kijai yimsüsüa aruba dak alaka yimten telok ka kijai government kümteta yimsü asütsü makoker. Aji oda, Congress telok kijai government akümtsü makokba mapang Congress teloki anir United Progressive Alliance (UPA) kümer yimsüsüa aruogo aser tang BJP teloki aniba National Democratic Alliance (NDA) teloki yimsüsüa arudagi. Joko, akhi putu ama masü, yimten tsütsü tashitemet lenir aika adoker aser nübortema tangatetba kati arur, anungji nisung kati ashiba angaa telok ka sülen tapi agi anidaktsübaji aikati memulunger. Iba jagi telok kati dangbo government akümtsüsa nübo mneguteter aser iba putu mapangji süiogo. Atangji, US yimten yimsüsübaren nungbo yimten telok ana dang alitsü melar, anungji election shia yimten telok ana tsüngdang dang tokteper, Republican Party aser Democratic Party. Iba jagi khen Repulican teloki ano khen Democratic teloki ta pei pei teloki akokba mapang yimsü asür. Kasaji, nübortem rongnunga yimten telok ana rongnung ka nung adentsübaji tsürabur senmang amai kümadoker. Ibaji tera mesüka India nunga yimten telok noklang junga liaka, tang BJP teloki aniba NDA telok nung yimten telok 38 aser NDA telok anemer telok Congress dena yimten telok 26 longjemer election nung shilem agitsü bangjemogo. NDA anema tokteptsü longjemba telok dangji parnoki parnoksasa I.N.D.I.A (Indian National Developmental Inclusive Aliance) ta ajatsü lemtetogo. Iba I.N.D.I.A telok nung asenoki meteta aliba teloktemji, Congress, Aam Aadami Party, Dravida Munnetra Kazhagam, Janata Dal (United), Nationalist Congress Party, Shiv Sena, Samajwadi Party, Rashtriya Janata Dal, All India Trinamool Congress aser Communist Party of India nungertem lir. Atangji, BJP teloki yimsü asütsüsa akümba ya Congress tashimait akümba ajanga lir aser ano BJP telok anemer opposition-tem tang amaji sabang ka nung jungjunga longjemer election nung metoktepbajia Congress lenirtem dak tashi maitba ajanga liasü. Aji oda, Lok sabha nunga opposition teloka mesütetsüsa tatar züngsem akümba mapang nunga Congress teloki opposition purtem longjemtsüsa ajemalu mesütetba ajanga BJP telok nemsä takok ngudakja aruogo. Ajisüaka, tangbo Congress teloki prime minister menden merakteper aser tebilema mebilemer, opposition telok longjemer government akümtsüsa takok ngura ojang ta metetdaksüba agi, tangbo NDA nung madenba telok Congress dena telok 26 tashi I.N.D.I.A telok sabang nung longjemtetogo . Atangji, prime minister akümtsübajibo election nung takok anguba sülen dang ataloktsü, tamasa takok ngumatsüla. Aji oda, magili asüyonga külem dena aliba teloktemi agidi süra Congress nungia prime minister sütetsü . Ajisüaka, teinyaktetbabo mali saka tokolakbo süner ta süra, iba denjibo shibai denütsü. Tang renemba sentong ya tatem tashi otetra, I.N.D.I.A telok yagi NDA telok akoktsü lenmang sadema lir. Aji oda, I.N.D.I.A telok nung Congress nungisa mesüaka Mamata Banerjee ama aser Kejriwal nunger ama linük nung ato kilonser asütsü temsüa aliba purtema aika lir. Ajisüaka, itemji yutsür, I.N.D.I.A teloki government akümtsüsa takok ngura, kecha arendaka melii Nitish Kumar ato kilonser sūdaksü nung ajungtsü. Tang tangbo Nagaland nungi NPF aser NDPP nabo BJP teloki aniba NDA telok nung dena lir, kechiyong Nagaland nunga parnok külem ser government kuma lir. Anungji, parnokjibo melinüyonga 'court' nung nangzüktepadoker asünungji alitsüsa akümba amai dang lir. Tzü nung ango nükjidong kecha maka, tzü koloni odir, ilen jagi ao ama, asenokbo yimten tangatetba aser nükjidong dak mamangba teloktem asünungji, center nung kechi tzü yimdir, iba tzü sülenji aoer. Ashi, asenokang tzü ser tangartemang ango sūdaksü nunga koda jungla ta bilemer.

OLEMSABANG

Aor benjong Moatsü aser Tsüngremmong aruka shisadanger

I. Temsü jamir landmark colony, Dimapur.

Tir Yimyim adok 28th May 2023 nung ni ano limapur süa aliba mapang Moatsü mong nung Arju nunger mapa inyaka arudang ni angazüka aliba nungi asen Aor talisa Ongpanglen Tsürapur Moatsü mong nung nüpur ajak kanga dang asüngteta ashibanga amongtsü nükjidong yur monga arur ta asüba den Moatsü inyakyim lemsatepogo.

Saka Ni anguba aser ajangshia inyaka aruba den keni meputepba Moatsü inyakyim kar Tir Yimyim olemsapang nung 4th to 8th June 2023 nung adoka züngshiogo. Iba adok nung züluba along tongtipangsa Moatsü ya shi aser yi benjong tulutiba asünung kibong asüngteta ayubabo bulua mejimber saka Moatsü aser Tsüngremmong mapang nungbo pei apuanü amadoker nükdapangda-a japujaria, aser ledipodia letapa, kinüngtsürtemi ki mashi ayipba, aser Aor Moatsü dang ken-o tai temetent kecha pushia maor ta asüba aser ano iba mesükba tanga inyakyima aika tazünger ajaki kanga junga angatetogo, aser ibaji tenük khuli asü nung ajakji shidak ta amanger, saka iba ama memerükba mapatem Moatsü aser Tsüngremmong nung inyakba nungji Aor ajakbo dena malitsü südi ta bilemer. Kechaser asen Tsürapur Among tsümong aser tekülem ajak nükjidong ka dang süaka Yim shia inyakyim pe pei tangatetba nung inyakyimbo terara balala dang aru nung tangazüker aser tezülur Yim nungjibo yamaji sür alitsü akok. Saka Aor Moatsü dang iba mapa tamajung inyakba ken-o tai temetent kecha bushia maor ta asübajibo, talisa Ongpanglenbo ni-a mangu, aser Tsürapur shingaia shia maru, aser mangashi. Joko Tsüngremmong mapang arur asünung ano ni ajangshia aruba nungi Tatsü agi Tsüngremmong indang lemsatepner.

Iba among ya-a 1st August to 3rd August tashi amonger ta asenok ajaki meteta lir, iba among ya Alu ayimer parnoki tsünüba ajak züsenteta yur joko tejang adoka aliba mapang Aluyimer-a karbo tsük terarabo alu nungi bener adoka achiba mapang, parnoki inyakba ajak nung takok ngur, wara tamajung ajak kokteta arur joko mongpo arutsü mapang alima ajak süngjima aliba mapang ka nung amonger.

1st August, iba anogo dangya süngbenü ta ajar, iba anogo nung nüpur ajak supotsü renemshia amonger, tongtipangsa airtem asangurtem supotsü yanglutsür, asangortema Arem meini orr sütsüngzü (süngzü tulu aser talang) süngdong talangi tur aliba ali-i atsüzüker, aser süngzü talang yangluteta bener adoker ayur, iba den arem mein naro tepur tajung balala air nem agütsütsü atema bener adoker yua atar.

2nd August iba anogo dang chentinü ta ajar, Mewa tepiyung nung kiyung shia zünga balalai Alu-mapa inyaka arudang Tsüngrem mong nung achitsü Alui oa Ak kaka zünga shiai a-a atar, ano ibaji dang masü lokti balalai Nashi, Ak aika alidena atar aser item ajakji kecha Tsüngrem danga atakatem mesüi dang tepseter, aser Moatsü dang nungi Tsüngremmong shi telongsoba-taluposüa achir, yamaji chiyunger kulen joko nekongtsütsü mapang sütsüngzü bener adoka alibaji tila tanura dena yimer ajaki shilem agia iba sütsüngzü nungji amer tejakleni atsür aotsü meranger, aser asangurtemi sütsüngzü tazünglenji amer tesüleni atsüzüktsü meranger ta atsür senzüa pelateper.

3rd August, iba anogo dang mongzükna ta ajar, iba anogo nung asangurtemi arem mein nungi naro balala bener adoka aliba to bener air ayepdaki (ametsür kidang) tsükimaki aotsü aser item naroji pe pei nüknürar nem agüjia ki amaktsü aser airtemia mejimtsü tajung lazamori nung bener arua asangur nem agüjia longso tepa pelateper, aser tampurtema yamaji ki maktepa Tsüngrem mong temdaksür. Yim shia inyakyim terara balala alitsü akok saka Tsürapur mapangbo Moatsü nungbo Arü atsütepba yimya mali, aser Tsüngrem mong nunga Tsüngsangba yimya mali. Anungji tsürapuri tsüngkum den apet inyaka aruba amaji tanüasünga tensa den apet inyak nung ajungtsü, aser tsürapur mapang temeimer o temeimer na tsüngta nung naro aser mejimtsü agütsütepba amaji tanüa temeimer o temeimer na tsüngta nung mesüra kinunger tsüngta nung Moatsü mong aser Tsüngremmong mapang sempet agütsütepa among nung kanga dang ajungtsü ta kü tangatetba yari lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Impur Bible Seminary nung tebur hostel ki tasen lapokogo



July 20, 2023 nü Impur nung Impur Bible Seminary tebur hostel ki tasenba ABAM Executive Secretary Prof. Rev.Dr.Mar Pongener-i lapoktsüdang aser Impur Bible Seminary hostel nung alitsüpur teburtemi ken atandang tangokba noksa nung angur.

Mokokchung, Chiteni/July 20 (TYO): Impur Bible Seminary asoshi kanga dang nungtaka aliba tebur hostel ki tasen ka Brihostibarnü Ao Baptist Arogo Mungdang (ABAM) Executive Secretary Prof. Rev.Dr.Mar Pongener-i lapoktsüogo.

Ao limai Khrista yimsü tajung arur kelen kümsük 150 ajungba nungtem nung Mokokchung Town Baptist Arogo-i (MTBA) sen 7754000 tenla aguja iba Impur Bible Seminary tebur hostel ki ya sütsüogo.

MTBA-i iba ki kisung sütsüba dang masü saka Impur Bible Seminary tebur hostel

nung alir asoshi nungdakba yipten nungi tenzüker nungdakba osettsüset ajak peria yanglua renemja lir.

Iba ki ya ABAM Executive Secretary Prof.Rev.Dr.Mar Pongener-i Ibrü 3:4 zünger meshiteta sarasademer kelen lapokja liasü.

Iba ki lapokba sentong tatsüka agiba mapang nung sentong nung Tsüngremer lenisüba jazüka ABAM Church & Mission Secretary Rev.Yapang Mollier-i sarasadem, ki asüba osang tejanga MTBA Deacon Wb.Imchatiba ajanga lemsatöp aser Impur Bible Seminary Principal Wt.Imtilemla, ABAM

Executive Secretary Prof.Rev.Dr.Mar Pongener aser taoba Impur Bible School Headmaster Rev.Nungshi par asemia tepela o den tayongzüka o jembü, MTBA Pastor Rev.Ponen Longchar ajanga tayongzüka o jembüba den Impur Bible Seminary aser ABAM nem iba ki bendanga aguja liasü.

Kasa sentong nung Impur Bible Seminary hostel nung alitsüpur teburtemia ken tajung ka aten aser Impur Baptist Arogo Pastor Rev.Akok Amer-i sarasadema tembanga liasü.

Iba sentong ya MTBA nung Pastor Rev.Temsuwati Kichu leniba nung agia liasü.

ANOGO ABEN TSÜNGREM DEN

Lapok, Tashi Anga, Agi T. Ken 119:25-32

Temang tsütsü temulungjang ulubaji lendong lir. Saka tanelaren temulung ulubaji temoatsü ka lir. "Kodang nai kü mulungjang uludaktsüdir, ni ne temelaba lemangi asemtsü" (t.32). Na temang nung temulungjang waka lira, nai talangka asema moutettsü, saka na tanelaren temulung ulura, nai Kibuba den jajatsü aser asemtsü renema alitsü aser Kibuba nükjidong atalokdaktsütsü. Tasemteperi pa alizüng atongtsü asoshi pa lemang shitak nung asemer aser iba jagi pa nem maneni asemtsü tashi agütsür. Tanü ibaji Tsüngremi asenok nungi aginer. Asenoki atongtsü asoshi Pa nükjitong ka lir aser anidaktsü asoshi lemang ka lir. Aser Pa O ajanga asenok nem tashi agütsür.

Temulung uluba tetezü kechi? Mezüngbuba, temulung ulubaji Tsüngrem nem temulungjang lapoktsüba lir. Ibai ochi temulungjang aser ashir, "Kibuba, ne O agi ni yirujaka ni ibai aginer."

Tanabuba, temulung tului Tsüngremi mulungba nung tashi angar. Ibai ajemaluba temulungjang lir aser iba temulungjang yagi ashir, "O Tsüngrem, nai kechi shidir ni inyaktsü. Ni ne kilir. Na kü tesayur."

Tasembuba, temulung tuluji Tsüngrem sentsüwangshi agi sünga lir. Ibai tepela mulungjang lir. Kar temulung tila aser temesü lir. Parnok alima tila nung alir aser parnok tangatetba tila lir. Tsüngrem taochi metetba aser ochi temetetba nung anitsübaji koda tesüngmangtsü mapa lir (2Peter 3:18)! Asenok litsü ulushir. Tamalen mengui aliba tang asenoki angur, kechi mangashi liasü tang angashir. Tsüngrem asenok nem taküm tulu agütsür kechiaser asenok temulung tulu kar.

Tsüngremer ochiba dangi ne mulung lapokjang aser Pai mulungba nung tashi angang. Tashi angaba mera shia ne temoatsü alitsü aser tenzüka ulushitsütsü. Item ajak rongnung tongtipangtibaji Tsüngremer sentsüwangshi agi sünga alibaji lir.

Khristantemi tatembang anogo atema renema alitsüla: David Jeremiah



El Cajon, California nung aliba Shadow Mountain Community Church nung Pastor, David Jeremiah-i interview ka nung jembidang tangokba noksa nung angur.

Orlando, July 20 (Agencies): Pastor aser kaketzüür, David Jeremiah-i, Khristantemi tatembang anogo atema tanela tsütsü renema alitsüla; Khrista alimai tanaben arutsü, saka ibaji sendokertemi timtem ajurutsü, ta ashi.

Interview ka nung jembidang Turning Point Radio & Television Ministries tenzüksang aser Shadow Mountain Community Church

nung pastor, Jeremiah-i Khristantem dang Khrista alimai tanaben arutsü aliba atema renema alitsüla, ta ayongzüük.

Arrshi küm 82 pastor-i, "Asenok atema tatemtsü kuli kecha mali, kechiyong Laishiba ajanga asenok dang ibaji (Khrista tanaben arutsü) ataloktsü, ta shia lir," ta ashi.

'World of the End' kaket zülusang, Jeremiah-isa, "Kibuba

arutsü mapang anasa alima nung timtem alitsü. Khrista tanaben arutsü temaitsü mali, ajisüaka iba ama mongpuji ka tonga arudar aser tang asenok iba mongpu nungji lir ta ni amanger. Khristantemi Laishiba azüngtsüla aser ochi nungi mepilatsüla, kechiyong tang iba ama mongpuji lir ta ni bilemer," ta ashi.

Jeremiah-i sayutsüngidang aser pai züluba kakettem nung tatembang anogo indang Laishiba nung shia aliba shin otem kanga jembir aser zülur.

Khrista alimai arutsü mapang anasa alima tensa mapang aser temaitsü kar Laishiba nung shia lir; item rongnung rara, rara olulu aser wara densema lir, ta pai ashi.

"Shinga nem-a na mashiokdaktsütsü kümdangang, ta Laishibai ashir. Atangji, ochi maliba mapang ka nung asenok lidar. Laishiba nungsa rara aser raratsü olulu aser tashidak balala indang shia lir, yamaji asenoki coronavirus wara ajangshio," ta pai ashi.

"Item ama tatalokba ajanga asenok saksalemer aser Laishiba nunga itemji asenoki azünger. Item ama tatalokba kar alima nung atalokba mapang nung na saksalemtsüla," ta pai ashi.

Yaküm November ita nung Pew research study ka ajanga yamai bushiteta liasü, America nung 5 shia nungi nisung 2-ibosa "asenok tatembang mapang ka nung alir" ta amanger.

Tatembang putu ka nung alir, ta amangertem rongnungji, 'kenü anogobo Yisu Khrista alimai arutsü' ta amangertem aika lir.

Pastor Jeremiah-i, tatembang putu mapang nung Laishiba nung chichiba shin otem aser tai tesayubatem bendangtsüla, ta ashi.

Paisa, Yisu Khrista alimai arutsü anogo tejangja takzürtemi kümdangtsüla, kechiyong Tebu Tsüngrem dak alaka shingaia tatembang anogo mesüra mapangji meteta mali, ta Laishiba nung jangja jangja

shia lir, ta ashi.

Paisa Khristantem danga, item ama tiyazü ainkartem aser shinertem nungi asenok pilaa alitsüla, ta tekümdangtsü metetdaktsü.

"Laishiba nung anogo tejangja shia mali. Nisung kari Pa (Yisu) tanaben arutsü ta ashitsü, aser parnoki anogotema takzüktsü, ajisüaka nai iba nungjagi pilaa alitsüla, kechiyong ibaji ochi masü," ta pai ashi.

Paisa Khristantem dang, ochi azüittsüla aser Khrista tanaben arutsü atema renema aliba den külemi Khrista osangtajung lemsateptsüla, ta ashi.

"Asenoki tamangertem ama alitsüla. 'Yisu Khrista taruba hopta arutsü, anungji ni ilonga renema alitsüla' ta asenoki mebilemtsüla, ajisüaka mapang ajak nung asenok renema alitsüla, mapang ajak nung Khrista tanaben arutsü ata-a alitsüla, mita alitsüla aser mapa inyaka alitsüla, kechiyong Yisu Khrista tanaben arutsü," ta pai ashi.

**AO OSHI ANGAZÜKDAK:
TANÜ ANGAZÜKTSÜBA OJANG**



Tir Yimyim

Repsemzülur

(n) lokti tentet aser senden nung yarisema zülur (Assistant secretary)

* Tongti zülur malidang repsemzüluri senden nung lemtetbatem zülur.

Reptaka

(adv) o junga madoktet, temeli junga marakzüktet (stammer)

* Tsübura temeli nung o reptaka yur mejembitettsü.

OLONG PAITEP # 6582

15x15 crossword grid with numbers 1-18 indicating starting points for words.

TIPIEN

- 1. Yong oset ka - (5)
6. _ _ _ _ shi - (4)
7. Pei tasoli - (5)
8. Jara nung yangluba - (5)
10. Anü aliba mapang - (9)
16. Iba ya masü - (5)
17. Nisung tabensa - (4)
18. Tali - (5)

LANGTSÜNGLEN

- 2. Chiyongba oset - (4)
3. Ochi masü - (6)
4. Shimten - (6)
5. Nok agi ana aküm - (5)
9. Pei indang aküm - (3)
11. Tajatsü tim - (6)
12. Ajak / Songjen - (6)
13. Metsüdaker lao - (5)
15. Iba mapang - (4)

OLONG PAITEP # 6581 TELANGZÜBA

TIPIEN:

- 2. Mata, 4. Taktang, 5. Taremzük,
9. Kima, 10. Pakti, 13. Sasa,
14.Aru, 16.Anü. 18.Asentzü, 19. Waro

LANGTSÜNGLEN:

- 1. Ako, 3. Tazü, 4. Telemsa, 5.Tip,
6. Ama, 7. Raksa, 8. Kiochtsü,
11. Tan, 12. Isü, 15. Rata, 16. Ata.

NAI-A YA METETTER MA



Engraji nung vowel ka danga maliba olong rongnung talangtibaji "Rhythm" ya lir.

Noksa nung meputepi aliba 10 bushiang



July 20, 2023: May 4 nü Manipur kübok Churachandpur district nung tatalokba anema longkak aiba sentong ka nung Indigenous Tribal Leaders' Forum (ITLF) züngsemtemi shilem agiba noksa nung angur.

Manipur: Kaketshirtem migration certificate meliaka educational institute tem nung züngoksemettsü

Imphal, Chiteni/July 20 (Agencies): Manipur nung tensa apir State Education Department-i sangdong ka ajanga, Manipur kübok aser sorkari teyari agütsüba college tem nung 2023-24 academic year atema admission agütsü asoshi transfer certificate, migration certificate mesüira iba amala mesükba certificate koba kaketshir ket nung mali item certificate tem menüngdaksü, ta metetdaksüogo.

Commissioner of Higher and Technical Education, Government of Manipur H Gyan Prakash-i Bodhbarnü sangdong ka ajanga ashiba agi, college temi atakzüksüba mapang tashi ka nung

item dang kaketshirtem timtem tenüngdakba kuli kakettem ya angateta admission fee khen atema magütsü, kaketshirtem tenüng BOSEM/COHSEM nung school ka nungi kati belentsü aser state board nungi Central board-i aser Central board nungi state board-i belentsü atema melatsü mepeshia liasü.

ATSUM-i ken o dak sendaka alir ajak dang state nung tang tensa kanga mejungi aliba apir kaketshirtem timtem angatettsü asoshi mepeshia metetdaksüogo.

Department of Information and Publicity, ATSUM-i July 17 nü sangdong ka ajanga State Administration, ken o dak sendaka aliba ketdangsürtem aser educational institutions tem

angata admission fee khen atema magütsü, kaketshirtem tenüng BOSEM/COHSEM nung school ka nungi kati belentsü aser state board nungi Central board-i aser Central board nungi state board-i belentsü atema melatsü mepeshia liasü.

ATSUM-isa, state nung azütokshi anentsü aser yimjung asoshi inyaktepa humanity nem maongka ka agütsütsü asoshi mepeshia metetdaksüogo.

Manipur nung kin o kin tsüingda mangatettep adokba sülen tang tashi nung nisung 150 taküm samaogo aser kaketshirtem densema nisung 60,000 shi state kübok relief camp balala nung jenoka lir.

Meghalaya: Ozüing alema long atepba potet

Guwahati, Chiteni/July 20 (Agencies): Meghalaya kübok Wah Myntdu tesem nung West Jaintia Hills police-i, ozüing alema long atepba nung densema aliba earth-mover ka aser tata gari ishika puogo.

National Green Tribunal (NGT)-i iba amala inyakyim ya tenokdangba agütsür liaka maneni inyaksangshidar.

Mongolbar nikonngtsütsü osang angazükba sülen police temi jenjang agi aser Treiongriang, Jowai kübok Wah Myntdu nung ozüing alema long

tepa belenshiba poteta liasü.

Osang tejangja angazükba sülen Khooid Ya Ka Wah Myntdu tir KL Pariat aser Jaiñtia Students' Movement (JSM) tir Jordan Rymbai na den Jowai Police Station nungi ketdangsürtem iba tesemi aritepa oa liasü.

Iba team yagi aonung dumper ka iba tesem nungi long auya bener oya aliba nguteta liasü.

Gari anishirtem dang ken o ashishiba sülen parnok rongnung kati, parnok nisung ka

tenüng agi F Hinge-i tetuyuba agütsüba dak ajemdaker inyaksangshir ta ashi.

Iba nisungba yagi auyaba longtem ya Laad Mustem nung junction kati bener aotsü atema tetuyuba agütsü liasü.

Police temi iba inyakyim nung densema aliba earth-mover ka aser tata garitem pur oa liasü.

Maneni KL Pariat aser Jordan Rymbai nati ozüing alema lapokba longtep dak kibur anema Jowai Police Station nung ken o ka benokogo.

ZPM uniform civil code anemer

Aizawl, Chiteni/July 20 (Agencies): Mizoram nung opposition party tongtiba Zoram People's Movement (ZPM)-i linük nung uniform civil code (UCC) benoktsü atema merandangba anemer, ta shiogo.

ZPM working president K Sapdanga-i osangbenertem den sensaksemba mapang ashiba agi, linük nung uniform civil code (UCC) benoktsü merangba ya par party-i anemer ta shia tawa law

commission of India dangi shiti ka zülüogo.

Paisa, uniform civil code (UCC) ya benokra iba ajanga Mizo nung Khristan tem dak tamajungtiba kongshitsü, kechiyong Northeast states tem rongnungi Mizoram-i missionary tem timtiba yoker lir, ta ashi.

"Northeast nung iba ozüing ya mebenoktsü atema jembishinüdar, ajisüaka onoki uniform civil code (UCC) ya linük ajunga nung

mebenokdaksüner," ta Sapdanga-i ashi.

Tang tashi nung ruling Mizo National Front (MNF), Congress aser Mizoram Church Leaders' Committee nungeri uniform civil code benoktsü merangba ya parnokki anemer ta shia law commission dangi shiti zülüogo.

Kasa mapang nung BJP Mizoram unit-ia taoba mapang parnokkia linük nung uniform civil code benoktsü inyaksangshiba ya anemer ta shiogo.

Kenya nung sorkar anema longkak aiter nisung trok süogo



Nairobi, Chiteni/July 20 (Agencies): Bodhbarnü Kenya police aser longkak aiter tsüngta raratepba mapang nisung trok tepset, ta yangji aliba media osang ajanga ashi.

Nüburtem alitsü asoshi osettsüset balala nung jenjang tali akumba anema longkak aitdang linük yimtiba, Nairobi aser tzükumlen aliba Mombasa yimti nung tear gas khalokja liasü. Police aser longkak aiter tsüngta raratepba mapang injang khalokja nisung kar yirua liasü.

Opposition teloki asemnü longkak ait tenzükdang linük nung tongtipa yimti ana nung school tem shibanga aliba tangbo lapokogo.

Kenya nung nisung 300 shi pua lir.

Auyatsü tetsübo nung business aika shibanga lir, aser nüburtem azüdokshi ajurutsü tetsübo nung lir.

Taoba hopta longkak aitdang nisung 14 asü aser item rongnung nisung 10 bo police temi khasetba alitsü.

Human rights organisation

temi police tem sashia aitsür, kechiaser parnokki taoba Bodhbarnü tashi tali amshi ta ashir. Nairobi nung classroom nung tear gas khaloktsüba sülen tanur 50 dak tema mozü kidang yua lir.

Tir William Ruto indang sorkari taoba ita tax timba kumtsüba sülen opposition temi longkak aittsü ayongzuka liasü.

Longkak aitba ya national security asoshi timtem lir, ta police tekolakbai shia linük tesem balala nung riot police tem yoka liasü.

Nairobi aser Rift Valley kübok Nakuru densema jila kar nung longkak aiter tem lenmang mokdanga police dak long agi ona liasü.

Kisumu yimti nung aliba mozüki ketdangsur kati osangbener dang ashiba agi, nisung ana injang agi yirur morgue bushia anir aru.

Rift Valley region kübok Nakuru jila nung nisung pongu yiru aser item rongnung par pezü injang agi yiruba zübu liasü, ta yangji aliba media ajanga ashi. Anüdoklen

Makueni nung nisung ya injang agi yirua liasü.

Linük anüolen tsütsü Migori county nunga police den raratepba mapang nisung asem yirua liasü.

Meimchir temeden asoshi nokdaker aser diplomats temi Kenya nung tensa majungba indang khuret lemsatepa liasü, aser sorkar aser opposition dang parnok mangatetep tajunglen agi angatetteptsü ajungshi.

Küm tetenzüklen telok ana tsüngta jembishinü akatsü molungtepa liasü, saka Ruto'er teloki temolung magütsür, ta opposition temi ashir.

Opposition temi nüburtem alitsü tasakba akumba aser taoba küm election agiba indang jembiner, kong Tir Ruto-i tera agi takok angu aser makamaiter yaritsü nangzuka liasü.

Ajisüaka osettsüset nung jenjang atuba azüoktsü asoshi pai mera kecha magi aser par sorkari tax ang tali temloka totzü nung VAT anasü agi timba kumtsü.

Tan hopta tatemlen longkak aittsü lia opposition lenir Raila Odinga aser Kalonzo Musyoka indang security agientsüba sülen ano tensa ya tamajungba ang akumtsü amai sayur.

Kenya tir mezüngbuba indang kinungtsü Ngina Kenyatta asoshi shima aliba security officer tema agienogo ta ashir. La ya taoba tir Uhuru Kenyatta tetsü lir, shiba Odinga indang ally aser longkak aiter senotsü agi yarir, ta sorkari aitsür.

Wagner teloki Belarusian special forces nem training agütsür

Moscow, Chiteni/July 20 (Agencies): Brehostibarnü Belarus-i ashiba agi, sen yong raraba Wagner telok nungi instructor temi taoba mapang Soviet kübok aliba linük indang special forces nem training agütsü tenzükogogo, shirnoki Russia nung lenirtem anema mapang tatsüka nokdaker ita ka jungnüa lir iba osang ya angazüker.

"Tzünglu aruaka, Brestsky training ground kanga tatsük lir," ta Belarus defence ministry ajanga sangdong ka nung ashi aser sepaitem mask agir raradang amshiba hadir tem amer aliba noksa tem sayua liasü.

"Hopta ka tsüngta special forces units aser company nungi teshimtet nisungtemi Brestsky training ground nung combat tasks tem training agitsü," ta ministry ajanga Wagner tem athishia ashi.

Ukraine nung raraba nung Wagner teloki tongti shilem agia lir aser taoba ita Russia mitkar lenirtem menden nungi alutsü khanga liasü, saka mapang tatsüka lir anen.

Belarus lenir Alexander

Lukashenko-i Wagner tekolakba Yevgeny Prigozhin dang Belarus nung alitsü maongka agütsü aser Wagner commanders tem nungi par mitkartem ajangzüksü ta ashi.

Taoba hopta Minsk-i ashiba agi, tajangshibatem lemsateptsü asoshi defence ministry aser Wagner tsüngta "road map" ka yangluogo aser instructor temi territorial defence forces nem training agütsü tenzükogogo.

Bodhbar nikongdang video ka temai adokba nung Prigozhin-i Belarus nung par telok den jembia liasü, koba

Russia mitkar lenir anema nokdakba sülen pa indang video mezüngbuba alitsü.

Wagner den sendaktepa aliba Telegram channel temi prokshiba video nung Prigozhin-i ashiba agi, par sepaitem mapang tatsüka atema Belarus nung alitsü aser iba linük indang army ya alima nung "second army" kumdahtsütsü.

"Tongpang nung (Ukraine) kechi ataloker, ibai maksü lir aser yangji onoki shilem agitsü menüngdak. Saka meilongi Wagner tem raradaki meyipa aotsü," ta Prigozhin-i ashi.

SÜR KUM 10 AJUNGBA MENUNGRA BILEMTETER



Lt. WATIMONGBA (YAONGYIMSEN)
Onoki teti bilemteter
Onok molung nung teti alir.
(Temeim Kinungtsü aser Chirnurtem)

Mulungnen



Lt. Lanutenla (Mangmetong)
15.02.1947 - 16.07.2023

Onoki teti meima aliba tsürabur aser kinungtsü, mapang talangka manemi aliba mapang aser la Kibuba kidangi meyipa aoba mapang nung shirnokisa ozü khuret ajak nung nübu, rongsen, shisatsü, sarasadem aser lenmang balala ajanga yaritepogo ajak dang kanga pelaba lemsateper.

Tsüngremi nenok ajak nem tatem makai temoatsü agüjang ta onoki sarasademtsür.

Temeim Kinungbo, Chirnur, Semchisemnur, Kinungertem aser Anükapang.

Office of the DIMAPUR MOLUNGYIMSEN SENSO TELONGJEM

Dimapur, Nagaland, Pin - 797112

TENÜNGSANG AGÜTSÜR



1. Wb. C. Shingwang Konyak aser Wt. N. Alila na jala Rajya Sabha MP & Nagaland BJP Mahila Morcha President **S.Phangnon Konyak**-i Rajya Sabha indang panel of vice-chairpersons nung züngsemtsüsa jenjang tulu anguba atema kanga pelar. Iba akhümket mapa anguba atema tenüngsang agütsür aser wadang tasen inyaka aodang Tsüngremer temoatsü nü den teti dena liangma ta DMST-i sarasademtsür.

2. 12th World Choir Games Gangneung, South Korea nung gold medal ana tashi ngua Nagaland atema dang masü saka India atema konang bentsür arur The Nagaland Chamber Choir (TNCC) züngsemtem rongnung Wb. A. Molung Tzüdir aser Wt. Nükensangla na jala **Asongla Tzüdir** züngsemba atema kanga pelar aser tenüngsang agütsür. Maneni nü sempet Tsüngrem sentsüwangshi atema amshiang ta DMST-i moatsür.

Sd/-
T. Alemba Jamir
President, DMST

Sd/-
C. Tangit Aier
Secretary, DMST



Office of the LION'S CLUB LONGSA

TENÜNGSANG AGÜTSÜR

Nagaland Staff Selection Board (NSSB) nung takok angur nem tenüngsang agütsür.

1. Mr. Sentilong Lemtur Fine Art Teacher, Department of school Education. S/o Mr. Temjennungsang aser Mrs Kilangtola.
2. Mr.Nungsangmanen Longkumer. Assistant Fishery Inspector, Department of Fisheries and Aquatic Resources. S/o Mr. Lt. Zungasanen aser Mrs Meyirenla.
3. Miss Takasenla Lemtur, Assistant Fishery Inspector, Department of Fisheries and Aquatic Resources. D/ o Mr Limanungsang aser Mrs Sungjemmongla.

Asen teyanglur Tsüngremi nenok wadang nung moajangma ta asen club sarasadem.

Sd/-
Nungsangtemshi
President

Sd/-
Temsutoshi
Secretary

State-level Catch Them Young Tournament tenzükogo



Dimapur, Chiteni/July 20 (TYO): 14buba State-level Catch Them Young Tournament (Taekwondo) July 20 nü Indira Gandhi Stadium, Kohima nung tenzükogo. Asayamung lapokba sentong nung Advisor for Youth Resources & Sports, S. Keoshu Yimkhiung alakteta jaoker liasü.

Sentong nung o jembiba mapang Yimkhiung-i, "tanü ya nenok mapang lir. Tanü mesüra kodang? Asenok mesüra shiba atatsü," ta ashi. Paisa, asayamung tajung ayongzükba atema Department of Youth

Resources & Sports danga kanga pelaba lemsatepba den Department-i lanurtem parnok nukjidong tongteta asayatsü aser parnok atema dang masü saka state aser linük nung tangaria parnok jangja kümdaktsüsü atema takokba tashi inyakdar, ta ashi.

Yimkhiung-isa, asayamung nung shilem agirtemi tetoktepba ya takok angutsüba atema dang masü saka yimya tajung beshia asayaba aser asaya meima asayaba ajanga tangar mulung koktettsüba atema-a lir ta angatetsüla, ta

ashi. Maneni pai taküm nung lenla ajak nung tetsükdaktsü ajangshitsü aliba indang lemsatepba den parnok dang mapang kanga shisaka-a amshitsü mepeshia liasü. Paisa, takokba tashi tajungtiba agütsüsü merangtsü aser maongkatem takok tashi agitsü merangtsü ajungshi.

Sentong nungsa Tenloi Phom lenisüba nung asayatem tenangzüktepba agiba sentong agi. Iba sentong ya Commissioner & Secretary, YR&S, Wezope Kenye lenisüba nung agia liasü.

Kohima Inter-School Athletic Meet tenzükogo



Advisor for School Education and SERT, Dr. Kekhrielhoulie Yhome aser DC Kohima, Shanavas C IAS "Inter-School Athletic Meet" nung shilem agirtem den agiba noksa.

Dimapur, Chiteni/July 20 (TYO): District Sports Office, District Education Office, Kohima District Athletic Association, aser District Hub for the Empowerment of Women Kohima den longjemer Kohima District Administration-i July 20 aser 21 nü asayatsü atema "Inter-School Athletic Meet" ayongzükogo.

Iba asayamung ya Ministry of Women and Child Development, GOI kübok "Beti Bachao Beti Padhao" sentong dak ajemdaker Indira Gandhi Stadium, Kohima nung asayadaki.

Asayamung lapokba sentong nung Advisor for School Education and SERT, Dr. Kekhrielhoulie Yhome alakteta jaoker liasü. Pai ashiba agi "Beti Bachao Beti Padhao" sentong kübok sorkari tetsür tanurtem atema lenmang aika lapoktsüogo. Paisa tetsür kaketshirtem dang maongka kechisa agütsüdir itemji takok tashi agitsü ajungshia liasü.

Dr. Yhome-i, kaketshirtem dang saisapong ajanga shitemang aser tekelok anema alitsü asoshi jenjang tapet agitsü ajungshiba den yimyayimpong shidak beshiba ajanga dang temaba jenjang tongteter ta ashi. Tarutsü nung district ajak ayimjema asayamung tuluba ayongzükba agitsü pai tenangzükba agüja liasü.

Sentong nungsa Deputy Commissioner Kohima, Shanavas C IAS-i, tanga state ama masü Nagaland nung tetsürtem atema activity aikabo mali aser talisa saisapong nung kanga ajema lir ta ashi. Anungji "Beti Bachao Beti Padhao" sentong kübok District Administration-i, career opportunities indang tangazükba agütsüsü asoshi line department den longjemer iba inter-school sports meet ayongzükogo ta ashi.

Maneni sentong nung Dr. Yhome-i saisapong nung takok tajung anguba tetsürtem nem

tetushi agütsü. Tetushi ya Sakhabama yimtsüng nungi Vikono Kezo aser Kidima yimtsüng nungi Edikunu Rikha na nem agüja liasü. Tenati Northeast aser National jenjang nung kanga junga asaya takok tajung ngutetba atema iba tetushi agüja liasü.

Sentong nungsa District Education Officer, Emilo Patton-i tepela o jembiba aser Linoto Katty lenisüba nung asayatem tenangzüktepba agi. Maneni sentong nung Asso. Pastor, Lerie Baptist Church Kohima, Atho Sothu-i Tsüngrem temaotsü meshizüka sarasadem aser Virie-i ken ka tena liasü. Iba sentong ya Kesoneinuo, District Hub for the Empowerment of Women Kohima lenisüba nung agia liasü.

Ajak senteper iba asayamung nung Kohima jila aser temeket nung aliba Private School 24 aser Government High School 9 nungi kaketshirtemi shilem agidar.

Bengaluru FC-i striker Curtis Main alizükogo

Chiteni/July 20, 2023 (Agencies): Indian Super League (ISL) club Bengaluru FC-i Mongolbarnü sangdong ka ajanga English striker Curtis Main den küm ka atema tenangzüktepba yangluba sangdongogo. Pa den ano tenangzüktpba küm ka atsülangshitsü atema nangzüktepa yuogo.

Main, shiba testüsa Scottish Premiership nung St Mirren nungi asaya liasü, pa Sunderland AFC nungi asaya-a career tenzük. Pa ya Darlington FC Academy nungi anitetba asayar ka lir.

"Ni iba club nung densemba atema kanga pelar. Ni manager den khen anaben ka sensaksemogo aser ni pa sentong kanga sakloka liasü. Pa coach tajung ka aser tang tashi club kanga junga len ania arudar aser ni aruba sülen iba takok dak ajemdaker maneni tejakdangi aotsü imla atar. Ni team nung adentsü aser iba den fan tem den ajuruteptsü yongya atar," ta Main-i ashi.

Main ya South Shields nung aso aser Darlington tenung nungi asayaba asayatem rongnung tanobusang aküm. Pa arishi küm 15 ser anogo 318buba nung League Two nung Peterborough den

asayaba mapang mezüngbuba asaya liasü.

Maneni pa Middlesborough, Doncaster Rovers aser Portsmouth nungi asayaogo. Pa Portsmouth nungi asayaba mapang mezüngbuba season League One-i promote süa liasü, iba season pai goal pongu idaktsü.

2018 küm Main, Scotland-i oa Motherwell nungi asaya.

"Pai taoba season St Mirren nungi kanga junga asayaogo. Pa ya temulung ajak agi bendanga agüja asayaba striker ka lir, shibai team atema kanga meranga inyaker. Pai asaya kanga junga azüokteta asayar aser pa tongtibang asayar ka asütsü," ta head Coach Simon Grayson-i ashi.

2019 küm Aberdeen den tenangzüktepba yangluba sülen Main iba club nungi season ana asaya aser 2020 küm England nung Shrewsbury Town-i ao.

Maneni pa 2021 küm Scotland-i meyipa oa St Mirren nungi asaya aser season ana nung pai goal 14 idakja liasü.

Main ya taküm Bengaluru FC-i alizükba bendanger asayar tanabuba kümogo. Bengaluru FC-isa, taobaa mapang Montenegro nung centre-back Slavko Damjanovic alizükba sangdongogo.

FIG-i Russia & Belarus nunger gymnast tem nem temelaba agütsü

Chiteni/July 20, 2023 (Agencies): Russia aser Belarus nunger gymnast tem nem January 1 nü nungi tenzükba neutral asayatem ama shilem agidaktsüsü, ta iba asaya achaayangba lokti tentet sangdong ka ajanga metetdaktsü.

Russia-i Ukraine amaka tenzükba sülen 2022 küm March ita linük anaprongla nungi gymnast tem international tetoktepba balala nung shilem magitsü atema tenokdangba agüja liasü.

International Gymnastics Federation (FIG)-i ashiba agi, parnoki Russia aser Belarus nunger asayatem aser support personnel tem neutral asayatem ama FIG Calendar nung züngoksema aliba FIG-i ayongzükba asayamungtem nung shilem agitsü atema temelaba agütsüogo.

Gymnast tem ya 2024 küm tetenzük nungi asayatsü atema temelaba agütsüsü, ajisüaka parnok Russia mesüra Belarus mesüra par linük national sporting bodies tem den sendaktepa malitsüla, ta FIG-i ashi.

"Russia aser Belarus nunger asayatem neutral asayatem ama tetoktepba balala nung shilem agitsü agizükba ajanga FIG-i asayatem temeden akümtsübuba sayur aser Gymnastics asayai yimjung aginer ta alima dangi osang ka yoker," ta FIG tir Morinari Watanabe-i ashi.

Ajisüaka gymnasts tem taruba küm Paris Olympic nung asayatsü masayatsü aji tang tashi mejangjai lir, kechiyong iba telemtetba ya International Olympic Committee-i agitsü, ta FIG-isa shisem.

IOC-i taoba mapang Russia aser Belarus nunger asayatem neutral asayar ama saisapong nung maneni shilem agidaktsüner ta shiogo.

Ajisüaka Olympics asayatsü küm ka anunga lia asaya balala achaayangba lokti tentetemi tang tashi telemtetba magiteti lir.

Athletics aser swimming federations-ibo parnoki Russia aser Belarus nunger asayatem masayadaktsüsü ta shiogo ajisüaka judo aser fencing association-ibo parnok asayadaktsüsü atema temelaba agütsüba sangdongogo.

BILEMDANGANG

"Timtem tekangshi ajanga nisung ka shisa ka-a kümdaktsür."